

■ CONVIVENZA

La vernisch è davent!

DA PIEDER CAMINADA*

L'istorgia ma fascinescha. Quai è già adina stà uschia. Cura ch'ìl bab d'in cumpogn da scola m'ha dumandà ina giada tge che saja mes rom preferi en scola hai jau respundi senza targlinar: «Istorgia!» Ses commentari sitg e betg senza ironia: «Lura has ti en quest rom segir la meglra nota.» Jau sun ma sentì traplà, hai dentant engirà che istorgia m'interesseschia vairamain – tge che n'era betg ina manzegna.

Perquai ma fascinescha era già dapi adina l'istorgia d'hotels grischuns cun ina ritga tradiziun. Cunzunt sch'els han cun-tanschì da cumbinar la tradiziun e la moderna a moda che l'istorgia da la chasa è anc da sentir dapertut – senza ch'i savuria da miffa.

Gist quests patratgs èn ids tras mes chau cura che jau hai vulì baiver d'acurt in café en in da quests hotels da tradiziun grischuns. Cun accent sin «vulì». Bain ha la dama da la recezziun ma sincerà che mia dunna ed jau possian natiralmain baiver in café en la lounge da l'hotel. Dentant pareva il camarier d'esser d'ina outra opiniun. El na vuleva simplamain betg vegnir a nossa maisa, e quai malgrà ch'i deva ultra da nus mo anc in pèr en la lounge e malgrà ch'el aveva già nus pliras giadas en vista.



Uschia avain nus gì temp avunda per guardar enturn. A nus è dà en egl in cup da jogurt. Ses cuntegn era per part svidà ora sin il plat da la maisa vischina. Ma er uschiglio fascheva la lounge l'impressiun che nagin n'haja s'empatschà l'ultim temp dad ella.

Suenter var in quart d'ura S'è il camarier finalmain cumparì tar nus – dentant pir suenter che la recezziunista al aveva supplitgà da prender encunter nossa empustaziun. Puspè hai cuzzà ina lunga urella fin che la «tschigulatta chauda» mo tievia ed il cappuccino – almain quel senza menda – stevan sin nossa maisa. Pir ussa m'è dà en egl quai che jau avess era pudì constatar già avant: las maisas avevan tuttas già vis megliers temps. Per far curtas: ellas avessan vertì in zic vernisch frestga. La fin finala sesevan nus en in hotel che sa lauda d'avair quatter stailas e mez. Ina sadella vernisch na custa en il Coop Bau + Hobby betg dapli che 29.95 francs per

liter – quai che tanschess per almain dudesch meters quadrats u var dudesch maisas...

Dal reminent, cura che nus avain bandunà in zic dischillusiunads la lounge da questa chasa da quatter stailas superiura steva il cup da jogurt vid anc adina sin la maisa vischina tschufagnada. Ed en mes tscharvè sa brischa en inevitablmain ina frasa tudestga che tutga la noda en il dubel senn dal pled: Der Lack ist ab!

* Pieder Caminada è mainaproject scolaziun e redactor tar la «Südostschweiz». El è creschi si a Glion en in ambient per gronda part tudestg e viva oz en la vischnanca rumantscha da Castrisch.

Vocabulari

vernisch – Lack
rom preferi – Lieblingsfach
targlinar – zögern
traplà – ertappt
engirar – schwören
savurar da miffa – muffelig riechen
camarier – Kellner
pèr – Pärchen, Paar
s'empatschar – sich kümmern
tievi – lauwarm
senza menda – einwandfrei
vertir – vertragen
sadella – Kübel
tschufagnà – verschmiert
tscharvè – Hirn
tutgar la noda – den Nagel auf den Kopf treffen

Unterstützt von der
Lia Rumantscha



Lia Rumantscha